



Broj/Број: 01/a – 50 – 1 – 15 - 78/10  
Sarajevo/Сарајево: 25.5.2010.

**ZAPISNIK**  
**78. sjednice Predstavničkog doma**  
**Parlamentarne skupštine Bosne i Hercegovine,**  
**održane 25. 5. 2010. godine**

Sjednica je počela u 10 sati. Prisustvovala su 34 poslanika.

Opravdano su odsustvovali: Selim Bešliagić, Nermina Zaimović-Uzunović, Azra Hadžiahmetović, Martin Raguž, Zlatko Lagumdžija, Jerko Ivanković Lijanović, Lazar Prodanović i Mirko Okolić.

Iz Vijeća ministara BiH sjednici su prisustvovali: Rudo Vidović, Safet Halilović, Bariša Čolak i zamjenik ministra finansija i trezora BiH Fuad Kasumović.

Iz međunarodnih organizacija sjednicu su pratili predstavnici: OHR-a, OSCE-a, EUSR-a, USAID PSP, američke ambasade, britanske ambasade i Centra civilnih inicijativa.

Sjednicu su pratili i predstavnici: Upravnog odbora Izvozno-kreditne agencije BiH, Agencije za zaštitu ličnih podataka BiH i Državne agencije za istrage i zaštitu, zbog razmatranja izvještaja o radu navedenih institucija, kao i pripadnici Oružanih snaga BiH: Milan Cicović, Stanko Đaković i Semir Mustajbegović.

Prije nego što se prešlo na raspravu o predloženom dnevnom redu, predsjedavajući je, u okviru prethodnih pitanja, informirao Dom da je Husein Nanić, 13.5.2010., dostavio Deklaraciju o osudi masovnog kršenja ljudskih prava civilnog stanovništva u Cazinskoj krajini 1950. i zločina počinjenih od nadležnih vlasti Jugoslavije/FNRJ, a 24.5.2010. predložio je da se Deklaracija preimenuje u Rezoluciju, te da se Dom, u skladu s članom 148. stav (2) Poslovnika, treba izjasniti, u okviru prethodnih pitanja, hoće li se Rezolucija uputiti u nadležnu komisiju. Predsjedavajući je stavio ovaj prijedlog na glasanje.

S 28 glasova „za“ (iz Federacije BiH 18, iz Republike Srpske 10), bez glasova „protiv“ i jednim „suzdržanim“ glasom, Dom je odlučio da se Rezolucija o osudi masovnog kršenja ljudskih prava civilnog stanovništva u Cazinskoj krajini 1950. i zločina počinjenih od nadležnih vlasti Jugoslavije/FNRJ uputi u nadležnu komisiju.

Nakon što je kratko upoznao Dom sa izmjenama dnevnog reda, predsjedavajući je otvorio raspravu o dnevnom redu.

U raspravi su učestvovali Denis Bećirović i Drago Kalabić.

Denis Bećirović predložio je da se sjednica prekine s obzirom da se obilježava godišnjica stradanja na tuzlanskoj Kapiji. Predsjedavajući je ovaj prijedlog stavio na glasanje.

„Za“ je bilo 15 poslanika (iz Federacije BiH 12, iz Republike Srpske tri), „protiv“ je bilo 10, a jedan poslanik bio je „suzdržan“. Predsjedavajući je konstatirao da nema potrebne

entitetske većine. Na zahtjev predsjedavajućeg Kuba SNSD-a, predsjedavajući je dao petominutnu pauzu. Nakon pauze, Drago Kalabić obrazložio je razloge traženja pauze.

Zatim je predsjedavajući Lozančić predložio pauzu od pola sata radi održavanja sjednice Kolegija Doma u proširenom sastavu.

Nakon pauze, predsjedavajući je rekao da Kolegij Doma u proširenom sastavu kao ni Kolegij Doma nisu postigli konsenzus o tome da li da se sjednica prekine, kao ni o tome da li postoji poslovnička mogućnost da se prijedlog za prekid sjednice stavi na glasanje. Zatim je na glasanje stavio prijedlog da se Dom izjasni da li da se stavi na glasanje prijedlog Denisa Bećirovića.

„Za“ je bilo 17 poslanika (iz Federacije BiH 14, iz Republike Srpske tri), „protiv“ je bilo devet a tri poslanika bila su „suzdržana“. Predsjedavajući je konstatirao da nema potrebne entitetske većine te slijedi izjašnjanje u drugom krugu.

Na zahtjev predsjedavajućeg Kuba SNSD-a, a zatim na zahtjev predsjedavajućeg Kluba SDA, predsjedavajući je dao pauzu od 10 minuta.

Nakon pauze, Drago Kalabić objasnio je razloge traženja pauze a Bakir Izetbegović nije imao potrebu za obrazloženjem pauze.

S obzirom da je došlo do tehničkih smetnji, prešlo se na glasanje u drugom krugu podizanjem kartona. Predsjedavajući je konstatirao da je 10 poslanika iz Republike Srpske „protiv“ i da Dom nije prihvatio prijedlog da se stavi na glasanje prijedlog Denisa Bećirovića da se sjednica prekine.

Predsjedavajući je konstatirao da 78. sjednica Predstavničkog doma ima sljedeći

## **D N E V N I R E D**

1. Usvajanje Zapisnika 77. sjednice Predstavničkog doma;
2. Poslanička pitanja:
  - a) Komentari na dobivene odgovore,
  - b) Nova poslanička pitanja;
3. Zahtjev poslanika Martina Raguža za razmatranje Prijedloga zakona o izmjenama i dopunama Zakona o sukobu interesa u institucijama vlasti Bosne i Hercegovine po hitnom postupku, u skladu s članom 127. Poslovnika, zakon broj: 01-02-9-35-1/10, od 14. 5. 2010.;
4. Zahtjev Privremene komisije za pripremu Prijedloga zakona o popisu stanovništva, domaćinstava i stanova u Bosni i Hercegovini 2011. za razmatranje Prijedloga zakona o popisu stanovništva, domaćinstava i stanova u Bosni i Hercegovini 2011., po hitnom postupku, u skladu s članom 127. Poslovnika, zakon broj: 01-02-9-37/10, od 24. 5. 2010.;
5. Zahtjev poslanika Kluba SDA za razmatranje Prijedloga zakona o dopunama Zakona o službi u Oružanim snagama Bosne i Hercegovine, po skraćenom postupku, u skladu s članom 126. Poslovnika, zakon broj: 01-02-8-36/10, od 21. 5. 2010.;
6. Prijedlog zakona o autorskim i srodnim pravima, predlagač: Vijeće ministara BiH, zakon broj: 01,02-02-2-5/10, od 18.1.2010. (drugo čitanje) - odgođeno izjašnjanje na 77. sjednici Doma;

7. Prijedlog zakona o kolektivnom ostvarivanju autorskih i srodnih prava, predlagač: Vijeće ministara BiH, zakon broj: 01,02-02-2-4/10, od 18.1.2010. (drugo čitanje) - odgođeno izjašnjavanje na 77. sjednici Doma;
8. Prijedlog zakona o izmjenama i dopunama Zakona o radu u institucijama Bosne i Hercegovine, predlagač: Vijeće ministara BiH, zakon broj: 01,02-02-7-11/10, od 28.1.2010. (drugo čitanje) – odgođeno izjašnjavanje na 77. sjednici Doma;
9. Prijedlog zakona o promociji malih i srednjih preduzeća i preduzetništva u BiH, predlagač: Vijeće ministara BiH, zakon broj: 01,02-02-4-12/10, od 28.1.2010. (drugo čitanje);
10. Prijedlog zakona o izmjenama i dopunama Zakona o zaštiti tajnih podataka, predlagač: Vijeće ministara BiH, zakon broj: 01,02-02-8-19/10, od 4.2.2010., sa Izvještajem Zajedničke komisije za nadzor nad radom Obavještajno-sigurnosne agencije BiH;
11. Prijedlog zakona o izmjenama i dopunama Zakona o službi u Oružanim snagama Bosne i Hercegovine, predlagač: poslanik Niko Lozančić, zakon broj: 01-02-8-24/10, od 23.3.2010., sa Izvještajem Zajedničke komisije za odbranu i sigurnost BiH;
12. Prijedlog zakona o izmjenama i dopunama Krivičnog zakona Bosne i Hercegovine, predlagači: poslanici Kluba SDP, zakon broj: 01-02-5-31/10, od 21.4.2010. (prvo čitanje);
13. Prijedlog revidirane strategije Bosne i Hercegovine za provođenje Aneksa VII. Dejtonskog mirovnog sporazuma, predlagač: Vijeće ministara BiH, Prijedlog broj: 01-37-310/10, od 15.2.2010. (drugo čitanje);
14. Prijedlog strategije za razvoj sporta u Bosni i Hercegovini, predlagač: Vijeće ministara BiH, Prijedlog broj: 01,02-35-372/10, od 24.2.2010. (drugo čitanje);
15. Izvještaj komisije Kolegija o nastojanju za postizanje saglasnosti o Prijedlogu zakona o izmjenama i dopunama Zakona o polaganju pravosudnog ispita u Bosni i Hercegovini (zakon u prvom čitanju);
16. Godišnji izvještaj Visokog sudskog i tužilačkog vijeća Bosne i Hercegovine za 2009. godinu, materijal broj: 01,02-03-50-3-646/10, od 7.5.2010.;
17. Izvještaj o radu Upravnog odbora Izvozno-kreditne agencije Bosne i Hercegovine za 2009. godinu, materijal broj: 01,02-50-3-514/10, od 1.4.2010. (odgođena rasprava na 77. sjednici);
18. Izvještaj o zaštiti ličnih podataka u Bosni i Hercegovini za 2009., materijal broj: 01,02-50-3-595/10, od 22. 4.2010.;
19. Izvještaj o radu Državne agencije za istrage i zaštitu (SIPA) za 2009. godinu, sa Izjašnjenjem o određenim pitanjima (prijedlog za uvrštavanje: Zajednička komisija za odbranu i sigurnost BiH, akt broj: 03/1-50-3-503,51/10, od 4.5.2010.);
20. Davanje saglasnosti za ratifikaciju:
  - a) Sporazuma o finansiranju između Bosne i Hercegovine i Komisije Evropskih zajednica u vezi s horizontalnim programom o nuklearnoj sigurnosti i zaštiti od zračenja, u okviru Instrumenta za prepristupnu pomoć u 2008. godini,
  - b) Sporazuma o vojnom grantu između Vijeća ministara Bosne i Hercegovine i Vlade Republike Turske, Provedbenog protokola o finansijskoj pomoći između Ministarstva odbrane Bosne i Hercegovine i Generalštaba Republike Turske i

- c) Sporazuma o finansiranju i projektu između KfW-a, Frankfurt na Majni, i Bosne i Hercegovine i Javnog preduzeća „Elektroprivrede Hrvatske zajednice Herceg Bosne“ d.d Mostar (EP HZHB) – Projekat Dopunske mjere za Vjetroelektranu Mesihovina,
- d) Evropske povelje o regionalnim i manjinskim jezicima – Strasbourg, 5.11.1992.

#### **Ad.1. Usvajanje Zapisnika 77. sjednice Predstavničkog doma**

Predsjedavajući je konstatirao da su svi poslanici dobili Zapisnik. Zapisnik 77. sjednice usvojen je jednoglasno, s 33 glasa „za“ (iz Federacije BiH 21, iz Republike Srpske 12).

#### **Ad.2. Poslanička pitanja:**

##### **a) Komentari na dobivene odgovore**

##### **b) Nova poslanička pitanja**

Predsjedavajući Lozančić konstatirao je da su od prošle do ove sjednice odgovore na postavljena pitanja dobili:

- ❖ **Denis Bećirović** – od Tužilaštva BiH i Ministarstva pravde BiH, na pitanje postavljeno na 75. sjednici Doma, Ministarstva obrane BiH, na pitanje postavljeno na 76. sjednici Doma
- ❖ **Željko Kuzmanović** – od Ministarstva vanjskih poslova BiH, na pitanje postavljeno na 76. sjednici Doma
- ❖ **Sadik Bahtić** – od Državne agencije za istrage i zaštitu, na pitanje postavljeno na 76. sjednici Doma
- ❖ **Azra Alajbegović** – od Federalnog ministarstva zdravstva, na pitanje postavljeno na 75. sjednici Doma
- ❖ **Momčilo Novaković** – od Ureda za reviziju institucija BiH, na pitanje postavljeno na 76. sjednici Doma

##### **a) Komentari na dobivene odgovore**

Odgovore su komentirali: Sadik Bahtić, Momčilo Novaković i Željko Kuzmanović

##### **b) Nova poslanička pitanja**

Postavljena su nova poslanička pitanja kako slijedi:

#### **Šefik Džaferović**

##### *Pitanja upućena Vijeću ministara BiH*

1. U kojoj fazi je uspostavljanje Agencije za forenzička ispitivanja i vještačenja? Posebno da li je Agencija uradila strateški dokument vezano za potrebe agencija za provođenje zakona za pojedinim vrstama vještačenja, neophodne opreme, ljudskim

resursima, te finansijskim sredstvima potrebnim za rad? Ovo s obzirom na činjenicu da Agencija treba da postane servis agencijama za provođenje zakona.

2. Da li je napravljen plan za strateško preuzimanje ljudskih resursa i tehničkih kapaciteta iz agencija i organa za provođenje zakona u mjeri u kojoj se preuzimaju njihove nadležnosti? Ako nije, kada će se to uraditi? Ovim bi se omogućio kontinuitet u radu laboratorija, te izbjeglo nepotrebno gubljenje vremena i sredstava. Preuzimanje ljudstva desilo se u svim formiranim agencijama na državnom nivou u mjeri u kojoj je došlo do preuzimanja poslova.

### **Husein Nanić**

1. Pitanje upućeno Vijeću ministara BiH - Da li je Vijeće ministara BiH uključeno u kampanju o uvođenju obaveznog srednjeg obrazovanja i ako jeste, na koji način i kakav je stav Vijeća ministara BiH po pitanju uvođenja obaveznog srednjeg obrazovanja u BiH?
2. Ministarstvu pravde BiH, Visokom sudskom i tužilačkom vijeću BiH, Tužilaštvu BiH i Sudu BiH - Poznata je činjenica da je Momir Savić, pravosnažno osuđen na 17 godina zatvora zbog ratnih zločina koje je počinio na području Višegrada, pobjegao pravosudnim organima naše zemlje uoči izricanja drugostepene presude. Pitam da li je pokrenuta istraga po ovom pitanju i tražim da se Parlamentarnoj skupštini BiH dostavi informacija o tome, te šta ste preduzeli i šta će se preduzeti da se takvi i slični slučajevi više ne događaju?

### **Šemsudin Mehmedović**

Pitanje upućeno direktoru SIPA-e

Tražim da mi se dostavi kopija:

- a) Ugovora o izgradnji zgrade SIPA-e
- b) Aneksa ugovora o izgradnji SIPA-e.

### **Denis Bećirović**

Pitanja upućena Tužilaštvu BiH:

1. Šta ste konkretno učinili s ciljem procesuiranja odgovornih lica za operaciju zvanu „Mač 1“ koja je vođena protiv građana Cazinske krajine 1995. godine?
2. Šta ste konkretno učinili s ciljem procesuiranja odgovornih lica za počinjeni zločin na tuzlanskoj Kapiji 25. 5. 1995.?

### **Ekrem Ajanović**

Pitanje upućeno Ministarstvu civilnih poslova BiH - Mi znamo da postoje procjene u svijetu da je preko 30% lijekova sumnjivog porijekla i da su slabog kvaliteta tako da se svaka država štiti insistirajući da te lijekove koji se upotrebljavaju u zemlji kontroliraju njihove laboratorije, tzv. kontrolne laboratorije. Mi imamo vrlo značajnu kontrolnu laboratoriju koja je umrežena u evropske laboratorije a koja je dobila sve reference. Nažalost, i kod nas se procjenjuje da ima 1.800 lijekova koji nikada nisu kontrolirani u kontrolnom laboratoriju Agencije za lijekove, čime se dovodi u opasnost zdravlje cjelokupnog stanovništva BiH.

Istina, postoje mogućnosti kontrole van državnih laboratorija, što je vrlo opasno, jer svaka država preferira svoje proizvode i svoje lijekove. Prema tome, to se ne bi smjelo dozvoljavati.

Postoji registracija nekih lijekova mimo Komisije za registraciju lijekova što je protivno samom zakonu i donošenju Zakona o Agenciji za lijekove. S druge strane, postoji sumnja da Pravilnik o sistematizaciji nije u konačnici usvojen i da se radnici primaju mimo toga. I treća postavka na koju također treba da mi se odgovori jeste da se prema Zakonu o lijekovima mora napraviti esencijalna lista za sve stanovništvo BiH na državnom nivou. Međutim, ona još nije utvrđena jer, kako smo mogli neki dan gledati u emisiji, donošenju takve liste suprotstavljaju se čak i neki ministri iz entiteta, konkretno iz RS-a. I posljednja stvar koja me interesira je - pošto kontrolni laboratorij ima vrlo sofisticiranu i kvalitetnu opremu a nema dovoljno prostora, mada je ona zgrada u kojoj je smješten državna institucija u koju su se uselili nezakonito Federalno ministarstvo zdravstva i Federalni zavod za epidemiologiju, i taj spor vodi se na sudu, a osim toga u Sarajevu ima dovoljno zdravstvenih prostora koji su držale određene republičke institucije prije ovoga.

*Postavljam pitanje: Da li su ove činjenice istinite, ko je kriv za takvo stanje i šta će Ministarstvo civilnih poslova BiH preduzeti da se otklone ove anomalije i da se Zakon u cijelosti provede?*

### **Azra Alajbegović**

1. Pitanje Agenciji za lijekove BiH
  - a) Komisija za lijekove ne sastaje se već tri mjeseca i opstruira se dostupnost lijekovima građanima BiH. Zar u Agenciji za lijekove ne postoje stručnjaci kao što su specijalisti za kontrolu lijekova, spec. tehnologije, farmakolozi i slično, a koji bi mogli izvršiti procjenu registracione dokumentacije, ili da i dalje čekamo Komisiju za lijekove koja ne želi da radi bez naknade. Da li članovi Komisije za lijekove, kao eminentni stručnjaci, zdravlje svojih i naših građana gledaju kroz novac?
  - b) Zašto zamjenik direktora Agencije za lijekove svoje poslove ne obavlja u Banjoj Luci gdje je i sjedište direktora?
2. Pitanje za Agenciju za državnu službu BiH – Zašto se ne raspisuju interni konkursi za visokostručni kadar Agencije za lijekove BiH s obzirom da je Vijeće ministara BiH Pravilnik o sistematizaciji radnih mjesta usvojilo još u januaru? Zašto da se ta procedura ne obavi po prioritonom postupku?
3. Pitanje direktoru Agencije za lijekove BiH – Da li se može očekivati da će do 30. juna ove godine, odnosno do početka godišnjih odmora biti završena procedura internih konkursa, odnosno raspoređivanja visokostručnih kadrova u Agenciji ili se to namjerno odugovlači zbog interesnih sfera određenih farmaceutskih lobija i pojedinaca a kako ne bi profunkcionirala Agencija, odnosno farmaceutska inspekcija u sastavu te Agencije?
4. Pitanje za Ministarstvo vanjske trgovine i ekonomskih odnosa BiH – Izuzetno bih cijenila vaše napore da se pobrinete da se finalizira Nacrt zakona o okolišu i da se uputi na usvajanje bez daljnjeg odgađanja.

## **Mirjana Malić**

Pitanje upućeno Centralnoj izbornoj komisiji BiH - Kada će se osigurati tretman i kontrola uvoza papira neophodnog za štampanje glasačkih listića koji bi trebalo da bude tretiran kao vrijedonosni papir? Kako će se spriječiti zloupotreba i krađa glasačkih listića, odnosno osigurati uništavanje škarta pri štampi?

Inicijativa upućena Kolegiju Predstavničkog doma – Na osnovu člana 8. Poslovnika Predstavničkog doma, podnosim inicijativu da se u dnevni red jedne od narednih sjednica uvrsti nova tačka: „Osiguravanje transparentnosti i zakonitosti štampanja izbornih listića za predstojeće Opće izbore 2010. godine“.

Pitanje upućeno Vijeću ministara BiH- Prije osam godina Vijeće ministara BiH donijelo je Odluku o kvalitetu tečnih naftnih goriva kojom su propisani uslovi kvaliteta koje moraju ispunjavati tečna naftna goriva koja se koriste na teritoriji BiH te propisuju standardi kojima se određuju mjere fizičko-hemijskih osobina. Tom odlukom ostavljen je prostor od jedne do dvije godine do kada se mogu u BiH proizvoditi i prodavati različita tečna naftna goriva koja ne zadovoljavaju ove standarde, kako bi se do tada ostavilo domaćoj proizvodnji da uskladi svoju proizvodnju sa standardima kojima se čuva zdravlje ljudi i čovjekova okolina. Mada su za dio tečnih goriva proizvođači ispunili preuzetu obavezu, to se nije uradilo kako je obećao proizvođač, pa je Vijeće ministara BiH početkom 2004., 2005. i 2006. godine produžavalo dozvolu za proizvodnju i prodaju čak i kancerogenih goriva u BiH. Nažalost, ni nakon toga proizvođač nije ispunio obavezu da uskladi proizvodnju maziva i bezolovnog motornog benzina s potrebnim standardima. Umjesto da se obustavi trovanje ljudi i uništavanje okoliša, Vijeće ministara BiH je početkom 2007.godine donijelo Odluku da se dozvoli ekstraprofit i tako ostavilo novi rok kako bi se osvojila proizvodnja u skladu sa standardima, i to sve do sredine 2010. godine. Nažalost, ni do danas proizvođači nisu ispunili obaveze stare skoro osam godina, dok se nastavlja uništavanje okoliša i ispuštanje kancerogenih materijala kako bi se ostvarivao ekstraprofit za račun pojedinaca.

Tražim od Vijeća ministara BiH da:

1. uputi Parlamentarnoj skupštini BiH cjelovitu informaciju o ovom problemu kako bi se spriječilo daljnje štetno djelovanje po građane i državu.
2. hitno odgovori na pitanje - koje će mjere preduzeti da ne dođe do eventulanog poremećaja u snabdijevanju na tržištu, te da se zaustavi daljnja proizvodnja ovakvog „otrova“?
3. izloži plan mjera kojima će se omogućiti da se građani ubuduće ne truju na ovakav način.
4. odgovori na pitanje ko je odgovoran što se nakon više od tri godine, odnosno šest godina nije prestalo s ovakvom praksom i kako će se nadoknaditi šteta nastala po građane, državu i čovjekovu okolinu.

## **Remzija Kadrić**

Inicijativa upućena Vijeću ministara BiH – Pokrećem inicijativu da Vijeće ministara BiH poništi svoju odluku po kojoj će zaposlenici u institucijama BiH, koji budu imali veći obim posla, a njihovi rukovodioci ocijene da su se posebno zalagali, godišnje moći zaraditi najmanje još po jednu plaću.

## **Salko Sokolović**

Pitanje upućeno Ministarstvu komunikacija i prometa BiH – Ko i po čijem ovlaštenju i na osnovu kojih kriterija vrši raspodjelu bilateralnih CEMT dozvola?

## **Branko Dokić**

1. Pitanje je upućeno Vijeću ministara BiH, Ministarstvu komunikacija i prometa BiH i Ministarstvu finansija i trezora BiH – Molim da mi dostavite informaciju u kojoj je fazi realizacija zaključka Predstavničkog doma Parlamentarne skupštine BiH sa nastavka 73. sjednice, održane 23. 3. 2010.? Pomenutim zaključkom traži se od Vijeća ministara BiH da se raspoloživa sredstva akumuliranog viška prihoda nad rashodima RAK-a za 2008. i 2009. u potpunosti usmjere na realizaciju Projekta digitalizacije prijenosnog sistema i odašiljača Javnog RTV sistema BiH?
2. Pitanje je upućeno direktoru Uprave za indirektno oporezivanje BiH - Šta ćete preduzeti protiv neodgovornog službenika koji je neprofesionalno i neodgovorno istumačio član 356. Odluke o provedbenim propisima Zakona o carinskoj politici BiH, što je proizvelo ogromne štete po bh. prijevoznike? Ujedno tražim da sporno tumačenje stavite van snage.

## **Rifat Dolić**

Pitanje za Federalnu agenciju za privatizaciju i Federalno ministarstvo poljoprivrede, vodoprivrede i šumarstva - Kakva je struktura vlasništva u firmi Bosnalijek - Sarajevo i da li su se Agencija i Ministarstvo bavili podacima da se u sastavu imovine ove firme nalazi i dio imovine Agrokomerca - tačnije Fabrike za proizvodnju lijekova Akofarm, koja je neposredno nakon rata nezakonito otuđena iz Agrokomerca i premještena u Bosnalijek, bez bilo kakve dokumentacije i odluka nadležnih organa i institucija?

Poslanik je tražio da se pitanje dostavi i Državnoj agenciji za istrage i zaštitu na znanje.

## **Adem Huskić**

Pitanja upućena Vijeću ministara BiH - Kako na stanje sigurnosti u BiH utiču slučajevi bježanja iz zatvora osuđenih ratnih zločinaca? Ko je odgovoran za takve pojave i šta namjeravate preduzeti da se takvi slučajevi u budućnosti ne dešavaju? Kako ove pojave utiču na svjedoke u sudskim procesima protiv lica optuženih za ratne zločine, posebno zaštićene svjedoke?

## **Sadik Bahtić**

Pitanje upućeno Visokom sudskom i tužilačkom vijeću BiH – S kojim kriterijima se vodilo Visoko sudsko i tužilačko vijeće BiH kod imenovanja sutkinje Dragice Glušac za državnog tužioca?

**Ad.3. Zahtjev poslanika Martina Raguža za razmatranje Prijedloga zakona o izmjenama i dopunama Zakona o sukobu interesa u institucijama vlasti Bosne i Hercegovine po hitnom postupku, u skladu s članom 127. Poslovnika, zakon broj: 01-02-9-35-1/10, od 14. 5. 2010.**



Predsjedavajući je dao uvodne napomene, nakon čega su u raspravi učestvovali: Beriz Belkić, Vinko Zorić, Husein Nanić, Momčilo Novaković, Šefik Džaferović, Milorad Živković i Drago Kalabić. Vinko Zorić je, u ime Mješovitog kluba poslanika narodnih stranaka, predložio da se Prijedlog zakona razmatra po skraćenom postupku, u skladu s članom 126. Poslovnika Predstavničkog doma.

Zahtjev za razmatranje Prijedloga zakona po skraćenom postupku, u skladu s članom 126. Poslovnika, usvojen je s 31 glasom „za“ (iz Federacije BiH 20, iz Republike Srpske 11), bez glasova „protiv“ i dva „suzdržana“ glasa.

**Ad.4. Zahtjev Privremene komisije za pripremu Prijedloga zakona o popisu stanovništva, domaćinstava i stanova u Bosni i Hercegovini 2011. za razmatranje Prijedloga zakona o popisu stanovništva, domaćinstava i stanova u Bosni i Hercegovini 2011., po hitnom postupku, u skladu s članom 127. Poslovnika, zakon broj: 01-02-9-37/10, od 24. 5. 2010.**

Nakon uvodnih napomena Nike Lozančića, u raspravi su učestvovali: Ekrem Ajanović, Adem Huskić, Remzija Kadrić, Šefik Džaferović, Milorad Živković, Bakir Izetbegović, Momčilo Novaković i Beriz Belkić.

„Za“ zahtjev za razmatranje Prijedloga zakona po hitnom postupku glasalo je 14 poslanika (iz Federacije BiH 13, iz Republike Srpske jedan), 17 je glasalo „protiv“ a dva poslanika bila su „suzdržana“. Predsjedavajući je konstatirao da zahtjev nije usvojen.

Zatim se Dom izjašnjavao o tome da se Prijedlog zakona razmatra po skraćenom postupku. „Za“ je glasalo 18 poslanika (iz Federacije BiH 15, iz Republike Srpske tri), 13 je glasalo „protiv“ i jedan je bio „suzdržan“. Predsjedavajući je konstatirao da nema potrebne entitetske većine, pa se prešlo u drugi krug glasanja.

U drugom krugu, s 14 glasova „za“ (iz Federacije BiH 12, iz Republike Srpske dva), 16 glasova „protiv“ (iz Federacije BiH šest, iz Republike Srpske 10) i jednim „suzdržanim“ glasom, Dom nije usvojio zahtjev, pa će se Prijedlog zakona o popisu stanovništva, domaćinstava i stanova u Bosni i Hercegovini 2011. razmatrati u redovnoj zakonodavnoj proceduri.

**Ad.5. Zahtjev poslanika Kluba SDA za razmatranje Prijedloga zakona o dopunama Zakona o službi u Oružanim snagama Bosne i Hercegovine, po skraćenom postupku, u skladu s članom 126. Poslovnika, zakon broj: 01-02-8-36/10, od 21. 5. 2010.**

Predsjedavajući Niko Lozančić dao je uvodne napomene. Bakir Izetbegović obrazložio je zahtjev za skraćeni postupak, nakon čega nije bilo rasprave u okviru ove tačke dnevnog reda.

S 31 glasom „za“ (iz Federacije BiH 20, iz Republike Srpske 11), bez glasova „protiv“ i dva „suzdržana“ glasa, Dom je usvojio zahtjev za razmatranje Prijedloga zakona o dopunama Zakona o službi u Oružanim snagama BiH po skraćenom postupku, u skladu s članom 126. Poslovnika.

## **Ad.6. i 7.**

Predsjedavajući Niko Lozančić dao je uvodne napomene. Podsjetio je Dom da je, u skladu sa zaključkom usvojenim na 77. sjednici Doma, održanoj 12.5.2010., Ustavnopravna komisija dostavila izmjenu Izvještaja o Prijedlogu zakona o autorskim i srodnim pravima i odlučila da se iz Izvještaja Komisije od 29.4.2010. briše amandman XVIII. Naveo je i to da, u plenarnoj fazi, četiri amandmana ponovo brani Jerko Ivanković Lijanović.

Također je, u skladu sa istim zaključkom, Ustavnopravna komisija dostavila izmjenu Izvještaja o Prijedlogu zakona o kolektivnom ostvarivanju autorskih i srodnih prava i odlučila da se iz Izvještaja Komisije od 29.4.2010. briše amandman XII. U plenarnoj fazi amandmane ponovo brani Jerko Ivanković Lijanović (28 amandmana), Nermina Zaimović-Uzunović (20 amandmana) i Klub poslanika SNSD-a (dva amandmana).

U raspravi su učestvovali: Šefik Džaferović, Milorad Živković, Momčilo Novaković.

Milorad Živković predložio je zaključak koji glasi:

**„Zadužuje se Ustavnopravna komisija da zakone pod tačkom 6. odnosno tačkom 7. (Prijedlog zakona o autorskim i srodnim pravima i Prijedlog zakona o kolektivnom ostvarivanju autorskih i srodnih prava) ponovo razmotri, u pravcu traženja kompromisnih rješenja, a u skladu s raspravom obavljenom na 77. i 78. sjednici Doma.“**

Predstavnički dom je, s 29 glasova „za“ (iz Federacije BiH 17, iz Republike Srpske 12), jednim glasom „protiv“ i tri „suzdržana“ glasa, usvojio zaključak Milorada Živkovića.

## **Ad.8. Prijedlog zakona o izmjenama i dopunama Zakona o radu u institucijama Bosne i Hercegovine, predlažać: Vijeće ministara BiH, zakon broj: 01,02-02-7-11/10, od 28.1.2010. (drugo čitanje) – odgođeno izjašnjavanje na 77. sjednici Doma**

Predsjedavajući je dao uvodne napomene. Podsjetio je da je, u skladu sa zaključkom Doma sa 77. sjednice održane 12.5.2010., Ustavnopravna komisija dostavila izmjenu Izvještaja o Prijedlogu zakona, u kojem se navodi da je Komisija usaglasila tekst amandmana XXIII. usvojen u Izvještaju Ustavnopravne komisije od 29.4.2010. U raspravi je učestvovao Šefik Džaferović.

„Za“ Prijedlog zakona glasala su 23 poslanika (iz Federacije BiH 20, iz Republike Srpske tri), niko nije bio „protiv“ a 10 poslanika bilo je „suzdržano“, te je predsjedavajući konstatirao da nema potrebne entitetske većine i da će Kolegij kao komisija, u roku od tri dana, pokušati postići saglasnost o čemu će Dom biti obaviješten.

## **Ad.9. Prijedlog zakona o promociji malih i srednjih preduzeća i poduzetništva u BiH, predlažać: Vijeće ministara BiH, zakon broj: 01,02-02-4-12/10, od 28.1.2010. (drugo čitanje)**

Niko Lozančić je u uvodnim napomenama rekao da je Zajednička komisija za ekonomske reforme i razvoj usvojila devet amandmana koji postaju sastavni dio Zakona, te da u plenarnoj fazi Azra Hadžiahmetović ponovo brani 35 amandmana. Beriz Belkić je, umjesto Azre Hadžiahmetović, obrazložio amandmane i predložio da se Dom o njima izjasni u paketu. Nije bilo rasprave.

Amandmani glase:

### **Amandman I.**

U Prijedlogu zakona u dijelu I. OPĆE ODREDBE, član 1. (PREDMET) mijenja se i glasi:

#### **Član 1. (Predmet)**

Ovim zakonom utvrđuju se ciljevi razvoja mikro, malih i srednjih poduzeća (u daljnjem tekstu: MSP) i poduzetništva, oblici stimulativnih mjera i programa, organi i institucije nadležni za provođenja mjera i programa, te osnivanje sljedećih institucija:

- \* Vijeće za razvoj i promociju MSP i poduzetništva u Bosni i Hercegovini,
- \* Agencija za razvoj MSP i poduzetništvo u Bosni i Hercegovini,
- \* Fond za razvoj i podršku MSP i poduzetništvo u Bosni i Hercegovini,

kao i formiranje:

- \* Sektora za razvoj poslovnog okruženja i poduzetništvo pri Ministarstvu vanjske trgovine i ekonomskih odnosa BiH.

### **Amandman II.**

U Prijedlogu zakona u dijelu I. OPĆE ODREDBE, član 7. (Vođenje statistike MSP) mijenja se i glasi:

#### **Član 7. (Vođenje statistike MSP-a)**

(1) S ciljem vođenja statistike i statističkih analiza MSP-a u Bosni i Hercegovini, uvode se sljedeće statističke kategorije:

- a) mikropreduzeća (MSP sa 1 do 9 zaposlenih)
- b) mala preduzeća (MSP sa 10 do 49 zaposlenih)
- c) srednja preduzeća (MSP sa 50 do 249 zaposlenih)

(2) Agencija za statistiku Bosne i Hercegovine i nadležne agencije za statistiku u entitetima i Brčko Distriktu Bosne i Hercegovine (u daljnjem tekstu: Brčko Distrikt) dužne, u skladu s kriterijima iz stava (1) ovog člana, sakupljaju, analiziraju, nadziru i objavljuju statističke podatke i informacije u skladu s evropskim statističkim standardima za MSP.

### **Amandman III.**

U Prijedlogu zakona u dijelu II. CILJEVI, STRATEGIJA I PROGRAM RAZVOJA I PROMOCIJE MSP I PODUZETNIŠTVA, član 8. (Ciljevi razvoja i promocije MSP i poduzetništva) mijenja se i glasi:

#### **Član 8. (Ciljevi razvoja i promocije MSP i poduzetništva)**

Ciljevi razvoja i promocije poduzetništva su:

1. ubrzanje ekonomskog razvoja zemlje i povećanja učešća MSP-a u društvenom proizvodu BiH;
2. povećati stopu zaposlenosti u BiH putem stimuliranja i poticaja poduzetničkih aktivnosti posebno kod mladih i žena;
3. unaprijediti efikasnost, kvalitetu i konkurentnost MSP podržavanjem preduzetničkih aktivnosti koje su bazirane na visokim tehnologijama i inovacijama;
4. povećati izvoz proizvoda i usluga na evropsko i svjetsko tržište, povećanjem učešća MSP-a u izvozu;
5. povećati broj MSP-a.

#### **Amandman IV.**

U Prijedlogu zakona u dijelu II. CILJEVI, STRATEGIJA I PROGRAM RAZVOJA I PROMOCIJE MSP I PODUZETNIŠTVA, član 9. (Strategija i Program razvoja i promocije MSP i poduzetništva) mijenja se i glasi:

#### **Član 9.**

##### **(Strategija i Program razvoja i promocije MSP-a i poduzetništva)**

1. Vijeće ministara Bosne i Hercegovine, na prijedlog Ministarstva vanjske trgovine i ekonomskih odnosa Bosne i Hercegovine (u daljnjem tekstu: Ministarstvo), usvaja Strategiju razvoja MSP-a u Bosni i Hercegovini (u daljnjem tekstu: Strategija) najkasnije do oktobra tekuće godine za naredni period od četiri godine;
2. Na osnovu utvrđenih ciljeva Strategije, Ministarstvo predlaže Program razvoja MSP-a i poduzetništva u Bosni i Hercegovini (u daljnjem tekstu: Program) za period od jedne godine.
3. Program razvoja MSP-a i poduzetništva u Bosni i Hercegovini iz tačke (2) ovog člana usvaja Vijeće ministara Bosne i Hercegovine do kraja marta za tekuću godinu.
4. Programom se utvrđuju smjernice razvoja, podsticajne mjere, institucije ili tijela nadležna za realizaciju aktivnosti iz Programa razvoja, izvori sredstava, rokovi za provođenje aktivnosti, te metodologija nadzora, analiza i izvještavanja.
5. Izvještaj o izvršenju godišnjeg Programa razvoja iz tačke (2) ovog člana sačinjava Ministarstvo u saradnji sa institucijama i tijelima nadležnim za realizaciju aktivnosti i dostavlja ga Vijeću ministara Bosne i Hercegovine na usvajanje.

#### **Amandman V.**

U Prijedlogu zakona u dijelu III. PODSTICAJNE MJERE, član. 10 (Podsticajne mjere) mijenja se i glasi:

#### **Član 10.**

##### **(Podsticajne mjere)**

- (1) Podsticajne mjere su aktivnosti preduzete od institucija i tijela u Bosni i Hercegovini nadležnih za predlaganje i realizaciju tih mjera i odnose se na:
  - \* uvođenje nastavnih planova i programa za poduzetništvo u školski sistem na svim nivoima obrazovanja, profesionalno usavršavanje i prekvalifikaciju, razvoj programa i obrazovnih sistema povezanih s poslovanjem;
  - \* otklanjanje administrativnih prepreka i pojednostavljanje procedura za osnivanje, registraciju i zatvaranje poslovnih subjekata;

- \* smanjivanje troškova i skraćivanje vremena za registraciju, preregistraciju i dopunu registracije;
  - \* harmoniziranje pravnih propisa u Bosni i Hercegovini i njihovo usklađivanje s regulativama, pravnom tečevinom i standardima Evropske unije u sektoru poduzetništva;
  - \* kreditiranje MSP-a pod povoljnijim uslovima, subvencioniranje kamata po preuzetim kreditima i kreditiranje MSP-a za početak poslovanja (start-up);
  - \* davanje jednokratne bespovratne pomoći MSP s ciljem zapošljavanja svakog novog radnika uz obavezu njihovog zadržavanja u naredne četiri godine;
  - \* subvencioniranje MSP-a s ciljem stručnog obrazovanja radnika, prekvalifikaciju ili dokvalifikaciju u visini dijela troškova stručnog obrazovanja, prekvalifikacije ili dokvalifikacije;
  - \* formiranje fondova rizičnog kapitala;
  - \* davanje jemstva za domaće i strane kredite;
  - \* povlastice za infrastrukturna izdvajanja (priključci za telefon, struju, vodu, kao i druga izdvajanja u procesu registracije MSP-a);
  - \* omogućavanje poreskih i carinskih olakšica prilikom uvoza repromaterijala za MSP iz proizvodnog sektora za proizvode namijenjene izvozu;
  - \* pružanje stručne i savjetodavne pomoći i organiziranje seminara i radnih stolova s ciljem informiranja i obrazovanja menadžmenta MSP-a;
  - \* organizacija sastanaka, konferencija i savjetovanja s predstavnicima udruženja poslodavaca;
  - \* davanje podrške za organizaciju i učešće na međunarodnim sajmovima, specijaliziranim izložbama i promocijama MSP-a u zemlji i inozemstvu;
  - \* davanje podrške MSP-u s ciljem podsticaja za istraživanje, razvoj, primjenu inovacija i uvođenje savremenih tehnologija;
  - \* organiziranje i podrška u osnivanju centara za poduzetništvo, poduzetničkih inkubatora i zona, tehnoloških parkova i klastera, kao i ostalih oblika poslovnih subjekata za podršku poduzetništvu;
  - \* uspostavljanje informacionog sistema MSP-a s ciljem njihovog umrežavanja sa svim institucijama za razvoj, podršku i promociju poduzetništva u Bosni i Hercegovini;
  - \* stimuliranje razvoja poduzetništva mladih i ženskog poduzetništva;
  - \* stimulirati djelatnosti MSP-a koji ne zagađuju okoliš;
  - \* omogućiti pristup MSP-u u javnim radovima, te nabavkama roba i usluga;
  - \* razvijati dijalog između javnog i privatnog sektora;
  - \* primjenjivati i ostale podsticajne mjere u skladu s primjerima dobre prakse;
- (2) Svaka od institucija ili tijela nadležnih za utvrđivanje i provođenje podsticajnih mjera, navedenih u članu 12. ovog zakona, razvijat će svoje programe podsticajnih mjera zavisno od djelatnosti, sjedištu ili veličini MSP-u utvrđenoj prema odredbama člana 3. ovog zakona i svojim aktima.

#### **Amandman VI.**

Nakon teksta iz amandmana 5. dodaje se novi član 11. (Podsticajne mjere) koji glasi:

**Član 11.**  
**(Podsticajne mjere)**

1. MSP mogu aplicirati za jednokratnu bespovratnu pomoć za zapošljavanje svakog novog radnika, uz obavezu njihovog zadržavanja na poslu u naredne četiri godine.
2. Ako MSP iz stava 1. ovog člana smanji broj radnika u periodu od četiri godine, nakon što je povećao broj radnika i ostvario pravo na pomoć, obavezan je vratiti iznos primljene pomoći srazmjerno smanjenju broja radnika za koje je ostvarena pomoć u roku od 30 dana od dana smanjenja radnika;
3. MSP-u koji je uputio radnike na stručno obrazovanje, prekvalifikaciju, dokvalifikaciju ili je sam organizira, može se odobriti pomoć u visini dijela troškova stručnog obrazovanja, prekvalifikacije ili dokvalifikacije.

**Amandman VII.**

U Prijedlogu zakona u dijelu III. PODSTICAJNE MJERE briše se član 11. (Osiguravanje prava na obavještenost).

**Amandman VIII.**

U Prijedlogu zakona u dijelu IV. NOSIOCI STRATEGIJE I PROGRAMA, član 12. (Nosioци provođenja Strategije i Programa razvoja i promocije MSP i poduzetništva) mijenja se i glasi:

**Član 12.**

(Nosioци provođenja Strategije i Programa razvoja i promocije MSP i poduzetništva)  
Nosioци provođenja Strategije i Programa razvoja i promocije MSP i poduzetništva u Bosni i Hercegovini u smislu ovog zakona su:

1. Ministarstvo vanjske trgovine i ekonomskih odnosa Bosne i Hercegovine -Sektor za razvoj poslovnog okruženja i poduzetništvo;
2. Vijeće za razvoj i promociju MSP-a i poduzetništva u Bosni i Hercegovini;
3. Agencija za razvoj MSP-a i poduzetništvo u Bosni i Hercegovini;
4. Fond za razvoj i podršku MSP-a i poduzetništvo u Bosni i Hercegovini;
5. Federalno ministarstvo razvoja, poduzetništva i obrta;
6. Ministarstvo industrije, energetike i rudarstva Republike Srpske;
7. Odjeljenje za privredni razvoj, sport i kulturu Brčko Distrikta;
8. Privredne komore na svim nivoima vlasti u Bosni i Hercegovini;
9. Zanatske komore na svim nivoima vlasti u Bosni i Hercegovini;
10. Regionalne razvojne agencije na svim nivoima vlasti u Bosni i Hercegovini;
11. Udruženja poslodavaca na svim nivoima vlasti u Bosni i Hercegovini;
12. Zavodi za zapošljavanje na svim nivoima vlasti u Bosni i Hercegovini;
13. Institucije svih nivoa formalnog obrazovanja (od osnovnog do visokog) uključujući institute i razvojne centre, kao i institucije i organizacije koje pružaju sve oblike neformalnog obrazovanja, dopunskog obrazovanja ili prekvalifikacije;
14. Statistički zavodi na svim nivoima vlasti u Bosni i Hercegovini;
15. Ostale institucije i organizacije na državnom, entitetskom, regionalnom, kantonalnom i lokalnom nivou za razvoj i podršku MSP-u.

### **Amandman IX.**

U Prijedlogu zakona u dijelu IV. NOSIOCI STRATEGIJE I PROGRAMA, član 13. (Obaveze na provođenju Strategije i Programa razvoja i promocije MSP i poduzetništva) mijenja se i glasi:

#### **Član 13.**

(Obaveze na provođenju Strategije i Programa razvoja i promocije MSP-a i poduzetništva)

1. Ministarstvo (Sektor za razvoj poslovnog okruženja i poduzetništvo), u saradnji sa svim institucijama navedenim u članu 12. ovog zakona, predlaže, nadzire, prati i koordinira provođenje Strategije i godišnjeg Programa MSP-a i poduzetništva u Bosni i Hercegovini, analizira rezultate, te izvještava i predlaže sistemske mjere ekonomske politike u ovom sektoru;
2. Vijeće za razvoj i promociju MSP-a i poduzetništva u Bosni i Hercegovini predlaže, prati i analizira provođenje Strategije i Programe razvoja, priprema informacije i prijedloge i predlaže sistemske mjere Vijeću ministara Bosne i Hercegovine;
3. Agencija za razvoj MSP-a i poduzetništva u Bosni i Hercegovini provodi elemente, smjernice i mjere navedene u Strategiji i programima razvoja i promocije MSP-a, predlaže razvojne projekte za naredni period, prati analizira i izvještava o provođenju Programa i projekata u skladu s aktima Agencije;
4. Fond za razvoj i podršku MSP-a i poduzetništva u Bosni i Hercegovini provodi usvojene smjernice iz Strategije i programa razvoja u dijelu koji se odnosi na raspodjelu i provođenje stimulativnih i podsticajnih mjera za razvoj i promociju poduzetništva, prema procedurama i kriterijima definiranim aktima Fonda;
5. Ostale institucije iz člana 12. ovog zakona predlažu razvojne projekte, sistemske prijedloge i podsticajne mjere iz svoje nadležnosti, neposredno provode mjere za koje su zadužene Strategijom i Programom te izvještavaju o postignutim rezultatima u skladu sa svojim aktima.

### **Amandman X.**

U Prijedlogu zakona u dijelu V. tekst FORUM/VIJEĆE ZA PROMOCIJU MSP-a I PODUZETNIŠTVA U BOSNI I HERCEGOVINI mijenja se i glasi:

#### **SEKTOR ZA RAZVOJ POSLOVNOG OKRUŽENJA I PODUZETNIŠTVO**

### **Amandman XI.**

U Prijedlogu zakona u dijelu V. član 14. ( Osnivanje i uloga Foruma/ Vijeća za promociju MSP i poduzetništvo) mijenja se glasi:

#### **Član 14.**

##### **(Osnivanje i funkcija Sektora za razvoj poslovnog okruženja i poduzetništvo)**

- (1) Ministarstvo vanjske trgovine i ekonomskih odnosa BiH, u skladu s članom 9. st. 6. i 7. Zakona o ministarstvima i drugim organima uprave Bosne i Hercegovine, kao i s ciljem bržeg ekonomskog razvoja i podsticaja i promocije MSP-a i poduzetništva u Bosni i Hercegovini, formira Sektor za razvoj poslovnog okruženja i poduzetništvo (u daljnjem tekstu Sektor);
- (2) Sektor se sastoji od tri odjela, i to:

- a) Odjel za razvoj i promociju poduzetništva;
  - b) Odjel za razvoj poslovnog okruženja i harmonizaciju ekonomskog prostora;
  - c) Odjel za regionalni ekonomski razvoj;
- (3) Organizaciona struktura Sektora kao i poslovi i zadaci odjela u Sektoru, te broj izvršilaca u Sektoru bit će definirani Pravilnikom o unutrašnjoj organizaciji Ministarstva vanjske trgovine i ekonomskih odnosa Bosne i Hercegovine.

#### **Amandman XII.**

U Prijedlogu zakona nakon član 14. dodati novi dio koji glasi: VI. VIJEĆE ZA RAZVOJ I PROMOCIJU MSP I PODUZETNIŠTVO BOSNE I HERCEGOVINE

#### **Amandman XIII.**

Nakon teksta iz amandmana 12. dodaje se novi član 15. koji glasi:

#### **Član 15.**

#### **(Osnivanje i funkcije Vijeća za razvoj i promociju MSP-a i poduzetništva u Bosni i Hercegovini)**

- (1) Za potrebe razvoja i promocije MSP-a i poduzetništva Vijeće ministara Bosne i Hercegovine formira Vijeće za razvoj i promociju MSP-a i poduzetništva u Bosni i Hercegovini (u daljnjem tekstu: Vijeće).
- (2) Vijeće je neprofitno javno državno savjetodavno tijelo Vijeća ministara Bosne i Hercegovine.
- (3) Zadaci Vijeća su da:
  - a) predlaže Vijeću ministara Bosne i Hercegovine razvojne strategije i programe razvoja i promocije MSP-a u Bosni i Hercegovini, entitetima i Brčko Distriktu;
  - b) prati i predlaže smjernice i mjere Vijeću ministara Bosne i Hercegovine za provođenje programa, vezano za razvoj i promociju poduzetništva i njihov uticaj na ekonomski razvoj Bosne i Hercegovine, entiteta i Brčko Distrikta;
  - c) podnosi Vijeću ministara Bosne i Hercegovine ocjene politika, mjera i programa razvoja i promocije poduzetništva i realizacije predloženih mjera i programa najmanje jednom godišnje;
  - d) daje preporuke Vijeću ministara Bosne i Hercegovine po pitanjima koordinacije tekućih i budućih mjera i programa za podsticanje razvoja MSP-a, poduzetništva i entitetskog i regionalnog ekonomskog razvoja;
  - e) daje preporuke i prijedloge Vijeću ministara Bosne i Hercegovine koje su usklađene s evropskom pravnom tečevinom, evropskim partnerstvom, evropskom praksom i evropskim standardima u sektoru MSP-a, s ciljem preduzimanja aktivnosti na provođenju evropskog zakona o malom biznisu u Bosni i Hercegovini.

#### **Amandman XIV.**

Nakon teksta iz amandmana 13. dodaje se novi član 16. koji glasi:



## **Član 16.**

### **(Sjednice Vijeća i Poslovník o radu Vijeća)**

- (1) Vijeće usvaja Poslovník o radu koji će definirati organizaciju rada Vijeća i procedure donošenja odluka na sastancima, u roku od 60 dana, nakon imenovanja članova Vijeća.
- (2) Vijeću će administrativno-tehničku podršku pružati Agencija za razvoj MSP-a i poduzetništvo Bosne i Hercegovine (u daljnjem tekstu: Agencija), nakon njenog formiranja. Do formiranja Agencije, podršku će pružati Ministarstvo (Odjel za razvoj i promociju poduzetništva).

## **Amandman XV.**

Nakon teksta iz amandmana 14. dodaje se novi član 17. koji glasi:

## **Član 17.**

### **(Sastav i imenovanje članova Vijeća)**

- (1) Vijeće ima 20 stalnih članova i može formirati po potrebi tematske radne grupe među svojim članovima za određena pitanja koja spadaju u njegovu nadležnost.
- (2) Vijeće ministara Bosne i Hercegovine imenuje članove Vijeća na prijedlog institucija:
  - a) Ministarstvo vanjske trgovine i ekonomskih odnosa Bosne i Hercegovine - jedan predstavnik;
  - b) Ministarstvo financija i trezora Bosne i Hercegovine - jedan predstavnik;
  - c) Ministarstvo razvoja, poduzetništva i obrta Federacije BiH – jedan predstavnik;
  - d) Ministarstvo industrije, energetike i rudarstva Republike Srpske – jedan predstavnik;
  - e) Odjel za privredni razvoj, sport i kulturu Brčko Distrikta – jedan predstavnik;
  - f) Agencija za razvoj MSP i poduzetništvo u Bosni i Hercegovini – jedan predstavnik;
  - g) Agencija za razvoj MSP i poduzetništvo u Federaciji Bosne i Hercegovine - jedan predstavnik;
  - h) Agencija za razvoj MSP i poduzetništvo u Republici Srpskoj – jedan predstavnik;
  - i) Fond za razvoj i podršku MSP i poduzetništvo u Bosni i Hercegovini-jedan predstavnik;
  - j) Vanjskotrgovinska komora Bosne i Hercegovine – jedan predstavnik;
  - k) Privredna komora Federacije Bosne i Hercegovine – jedan predstavnik;
  - l) Privredna komora Republike Srpske – jedan predstavnik;
  - m) Privredna komora Distrikta Brčko – jedan predstavnik;
  - n) Udruženje poslodavaca Bosne i Hercegovine – jedan predstavnik;
  - o) Udruženje poslodavaca Federacije BiH – jedan predstavnik;
  - p) Udruženje poslodavaca Republike Srpske – jedan predstavnik;
  - q) Udruženje općina Federacije BiH- jedan predstavnik;
  - r) Udruženje općina R. Srpske - jedan predstavnik;
  - s) Akademska zajednica Federacije BiH – jedan predstavnik;
  - t) Akademska zajednica R. Srpske - jedan predstavnik.

### **Amandman XVI.**

U Prijedlogu zakona nakon član 17. dodaje se novi dio koji glasi: VII. AGENCIJA ZA RAZVOJ MSP-a I PODUZETNIŠTVO U BOSNI I HERCEGOVINI.

### **Amandman XVII.**

Nakon teksta iz amandmana 16. dodaje se novi član 18. koji glasi:

#### **Član 18.**

##### **(Osnivanje i funkcije Agencije za razvoj MSP-a i poduzetništva u Bosni i Hercegovini)**

- (1) Za potrebe razvoja i promocije MSP-a i poduzetništva, koordinacije i izvršenja razvojnih strategija, smjernica, programa i mjera za ekonomski i poduzetnički razvoj, Vijeće ministara Bosne i Hercegovine formira Agenciju za razvoj MSP-a i poduzetništvo Bosne i Hercegovine (u daljnjem tekstu: Agencija).
- (2) Agencija je pravno lice i upisuje se u registar pravnih lica.
- (3) Agencija posluje pod nazivom Agencija za razvoj MSP-a i poduzetništvo u BiH.
- (4) Skraćeni naziv Agencije je AMSPBiH.
- (5) Sjedište Agencije je u Sarajevu.
- (6) Agencija je neprofitno pravno lice. U slučaju da se poslovanjem Agencije ostvari dobit, cjelokupni iznos dobiti ostaje Agenciji i bit će utrošen s ciljem realizacije zadataka Agencije.
- (7) Za obaveze Agencije garanciju daje Vijeće ministara Bosne i Hercegovine.
- (8) Na pitanja koja nisu uređena ovim zakonom na rad Agencije primjenjivat će se odredbe koje se odnose na društvo sa ograničenom odgovornošću.

### **Amandman XVIII.**

Nakon teksta iz amandmana 17. dodaje se novi član 19. koji glasi:

#### **Član 19.**

##### **(Djelatnost Agencije)**

(1) Djelatnosti Agencije su:

- 1) definiranje smjernica za izradu strategija razvoja malih i srednjih preduzeća u Bosni i Hercegovini u saradnji s entitetskim agencijama i agencijom Brčko Distrikta;
- 2) priprema i realiziranje programa, mjera, smjernica i projekata za razvoj i promociju malih i srednjih poduzeća u Bosni i Hercegovini;
- 3) koordiniranje aktivnosti s entitetskim agencijama i agencijom Brčko Distrikta na realizaciji strategija, programa, mjera, projekata i ostalih aktivnosti koja se odnose na razvoj i promociju MSP-a u Bosni i Hercegovini;
- 4) analiziranje i predlaganje zakonskih i drugih akata koji utiču na razvoj i promociju MSP-a;
- 5) u saradnji s edukativnim centrima i institucijama za obrazovanje, pripremanje programa za edukaciju, prekvalifikaciju ili doedukaciju i dokvalifikaciju poduzetnika;
- 6) izrada programa i projekata za razvoj i promociju poduzetništva u saradnji s entitetskim agencijama i agencijom Brčko Distrikta koji se finansiraju iz programa

pomoći Evropske unije, putem donacija međunarodnih finansijskih organizacija ili drugih međunarodnih institucija;

- 7) drugi poslovi i zadaci koji će biti definirani aktom o unutrašnjoj organizaciji Agencije.
- (2) Sredstva za rad i poslovanje Agencije osiguravaju se iz državnog budžeta, donacija međunarodnih organizacija i ostalih prihoda u skladu sa Zakonom.
- (3) Agencija o svom poslovanju podnosi godišnji izvještaj Vijeću ministara Bosne i Hercegovine.

#### **Amandman XIX.**

Nakon teksta iz amandmana 18. dodaje se novi član 20. koji glasi:

#### **Član 20.**

##### **(Organi i tijela Agencije)**

- (1) Organi i tijela Agencije su Upravni odbor i direktor Agencije.
- (2) Mandat članova Upravnog odbora i direktora Agencije je četiri godine, s mogućnošću ponovnog imenovanja nakon isteka mandata.
- (3) Direktor i zaposleni u Agenciji ne mogu biti članovi Upravnog odbora.

#### **Amandman XX.**

Nakon teksta iz amandmana 19. dodaje se novi član 21. koji glasi:

#### **Član 21.**

##### **(Upravni odbor Agencije)**

- (1) Upravni odbor ima predsjednika i pet članova odbora koje imenuje Vijeće ministara Bosne i Hercegovine na prijedlog institucija:
  - a) Ministarstvo vanjske trgovine i ekonomskih odnosa Bosne i Hercegovine - jedan predstavnik;
  - b) Ministarstvo finansija i trezora Bosne i Hercegovine - jedan predstavnik;
  - c) Federalno ministarstvo razvoja, poduzetništva i obrta – jedan predstavnik;
  - d) Ministarstvo industrije, energetike i rudarstva Republike Srpske – jedan predstavnik;
  - e) Odjel za privredni razvoj, sport i kulturu Brčko Distrikta – jedan predstavnik.
- (2) Upravni odbor donosi godišnji program rada Agencije i finansijski plan, te usvaja godišnji poslovni izvještaj Agencije i izvršenje finansijskog plana na prijedlog direktora.
- (3) Upravni odbor izvršava i druge zadatke definirane aktima Agencije.

#### **Amandman XXI.**

Nakon teksta iz amandmana 20. dodaje se novi član 22. koji glasi:

**Član 22.**  
**(Direktor Agencije)**

- (1) Direktora Agencije imenuje Vijeće ministara Bosne i Hercegovine, na prijedlog Upravnog odbora.
- (2) Direktor Agencije odgovoran je za:
  - a) zastupanje i predstavljanje Agencije;
  - b) organiziranje i rukovođenje radom Agencije;
  - c) predlaganje akata Agencije Upravnom odboru;
  - d) provođenje odluka Upravnog odbora i preduzimanje mjera za njihovo provođenje;
  - e) zakonitost rada Agencije;
  - f) predlaganje unutrašnje organizacije Agencije i godišnjeg programa rada Agencije;
  - g) podnošenje izvještaja o poslovanju i izvršenju finansijskog plana Agencije Upravnom odboru;
  - h) izvršavanje i drugih zadataka definiranih aktima Agencije.

**Amandman XXII.**

Nakon teksta iz amandmana 21. dodaje se novi član 23. koji glasi:

**Član 23.**  
**(Akti Agencije i nadzor na radom Agencije)**

- (1) Opći akti Agencije su Statut Agencije, Pravilnik o unutrašnjoj organizaciji Agencije i drugi akti koji su definirani Zakonom o radu neprofitnih organizacija s ograničenom odgovornošću.
- (2) Osnovni akt Agencije je Statut koji sadrži sljedeće odredbe o:
  - a) djelokrugu Agencije;
  - b) organima i tijelima Agencije;
  - c) drugim pitanjima značajnim za rad Agencije.
- (3) Pravilnik o unutrašnjoj organizaciji Agencije sadrži odredbe o:
  - a) organizaciji i načinu rada u Agenciji;
  - b) pravima, obavezama i odgovornostima zaposlenih u Agenciji.
- (4) Upravni odbor Agencije u roku od 60 dana od dana imenovanja donosi opće akte Agencije navedene u stavu (1) ovog člana.
- (5) Nadzor nad radom Agencije provodi Ured za reviziju institucija Bosne i Hercegovine.

**Amandman XXIII.**

U Prijedlogu zakona nakon člana 23. dodaje se novi dio koji glasi: VIII. FOND ZA RAZVOJ I PODRŠKU MSP I PODUZETNIŠTVO U BOSNI I HERCEGOVINI.

**Amandman XXIV.**

Nakon teksta iz amandmana 23. dodaje se novi član 24. koji glasi:

## **Član 24.**

### **(Osnivanje i funkcije Fonda za razvoj i podršku MSP-a i poduzetništva u Bosni i Hercegovini)**

- (1) Za potrebe razvoja i promocije MSP-a i poduzetništva, izvršenja razvojnih strategija, smjernica, programa i mjera za ekonomski i poduzetnički razvoj u dijelu koji se odnosi na finansijsku podršku i podsticaj MSP-a, Vijeće ministara Bosne i Hercegovine formira Fond za razvoj i podršku MSP-a i poduzetništva u Bosni i Hercegovini (u daljnjem tekstu: Fond).
- (2) Fond je pravno lice i upisuje se u registar pravnih lica.
- (3) Fond posluje pod nazivom Fond za razvoj i podršku MSP-u i poduzetništvu u Bosni i Hercegovini.
- (4) Skraćeni naziv Fonda je FMSPBiH;
- (5) Sjedište Fonda je u Sarajevu.
- (6) Fond je neprofitno pravno lice. U slučaju da se poslovanjem Fonda ostvari dobit, cjelokupni iznos dobiti ostaje Fondu i bit će utrošen s ciljem realizacije zadataka Fonda.
- (7) Za obaveze Fonda garanciju daje Vijeće ministara Bosne i Hercegovine.
- (8) Na pitanja koja nisu uređena ovim zakonom, na rad Fonda primjenjivat će se odredbe koje se odnose na finansijske institucije s ograničenom odgovornošću.

## **Amandman XXV.**

Nakon teksta iz amandmana 24. dodaje se novi član 25. koji glasi:

## **Član 25.**

### **(Djelatnosti Fonda)**

(1) Djelatnosti Fonda su:

- 1) Podsticanje osnivanja i razvoja MSP-a u Bosni i Hercegovini;
- 2) Podsticanje ulaganja u razvoj MSP-a u Bosni i Hercegovini;
- 3) Finansijska podrška osnivanju i razvoju MSP-a u Bosni i Hercegovini;
- 4) Kreditiranje i podsticanje ostalim finansijskim oblicima i promoviranje razvoj MSP-a u Bosni i Hercegovini;
- 5) Davanje finansijske podrške MSP-a s ciljem smanjenja troškova na kredite koji su dobiveni od banaka ili drugih kreditora;
- 6) Subvencioniranje kamata po kreditima koje su uzeli MSP-i;
- 7) Davanje finansijske podrške s ciljem povećanja zapošljavanja, stručnog obrazovanja, prekvalifikacije ili dokvalifikacije radnika;
- 8) Davanje finansijske podrške za razvoj istraživanja i primjenu savremenih tehnologija s ciljem povećanja konkurentnosti MSP-a i povećanja izvoza roba ili usluga;
- 9) Davanje finansijske podrške za učešće na međunarodnim sajmovima i specijaliziranim izložbama u zemlji i inozemstvu s ciljem promoviranja izvozno orijentiranih MSP-a;
- 10) Davanje jemstva na kredite koje MSP-ima odobre banke ili druge finansijske institucije.

- (2) Programom Fonda mogu se utvrditi različite podsticajne mjere, zavisno od djelatnosti ili veličini MSP-a koji su definirani u članu 3. ovog zakona.
- (3) Sredstva za rad i poslovanje Fonda osiguravaju se iz sredstava državnog budžeta, kreditnih sredstava domaćih i stranih banaka, donacija međunarodnih organizacija i finansijskih institucija, prihoda od povrata kredita i kamata na kredite i ostalih prihoda u skladu sa Zakonom.
- (4) Fond o svom poslovanju podnosi godišnji izvještaj Vijeću ministara Bosne i Hercegovine.

#### **Amandman XXVI.**

Nakon teksta iz amandmana 25. dodaje se novi član 26. koji glasi:

#### **Član 26.**

##### **(Uslovi za dobivanje kredita, finansijske i druge pomoći MSP)**

- (1) Kriterije i uslove kreditiranja, subvencioniranja kamata, davanja jemstva za kredite ili davanja bespovratne finansijske pomoći, utvrđuje Vijeće ministara, na prijedlog Fonda.
- (2) Kriteriji i uslovi iz stava (1) ovog člana objavljuju se u "Službenom glasniku BiH".
- (3) Odluku o odobravanju kredita, davanju jemstava za kredite, subvencioniranje kamata ili davanja druge vrste bespovratne pomoći, donosi Upravni odbor Fonda, na prijedlog direktora Fonda.
- (4) Protiv odluke iz stava (3) ovog člana može se podnijeti prigovor Ministarstvu u roku od sedam dana.

#### **Član 27.**

##### **(Organi i tijela Fonda)**

- (1) Organi i tijela Fonda su Upravni odbor i direktor Fonda.
- (2) Mandat članova Upravnog odbora i direktora Fonda je četiri godine, s mogućnošću ponovnog imenovanja nakon isteka mandata.
- (3) Direktor i zaposleni u Fondu ne mogu biti članovi Upravnog odbora.

#### **Amandman XXVII.**

Nakon teksta iz amandmana 26. dodaje se novi član 28. koji glasi:

#### **Član 28.**

##### **(Upravni odbor Fonda)**

- (1) Upravni odbor ima predsjednika i pet članova koje imenuje Vijeće ministara, na prijedlog institucija:
  - a) Ministarstvo vanjske trgovine i ekonomskih odnosa Bosne i Hercegovine - jedan predstavnik;
  - b) Ministarstvo finansija i trezora Bosne i Hercegovine - jedan predstavnik;
  - c) Ministarstvo razvoja, poduzetništva i obrta Federacije BiH – jedan predstavnik;

- d) Ministarstvo industrije, energetike i rudarstva Republike Srpske – jedan predstavnik;
- e) Odjel za privredni razvoj, sport i kulturu Brčko Distrikta – jedan predstavnik;
- (2) Upravni odbor donosi godišnji program rada Fonda i finansijski plan, te usvaja godišnji poslovni izvještaj Fonda i izvršenje finansijskog plana.
- (3) Upravni odbor izvršava i druge zadatke definirane aktima Fonda.

#### **Amandman XXVIII.**

Nakon teksta iz amandmana 27. dodaje se novi član 29. koji glasi:

#### **Član 29. (Direktor Fonda)**

- (1) Direktora Fonda imenuje Vijeće ministara, na prijedlog Upravnog Odbora.
- (2) Direktor Fonda odgovoran je za:
  - a) zastupanje i predstavljanje Fonda;
  - b) organiziranje i rukovođenje radom Fonda;
  - c) predlaganje akata Fonda Upravnom odboru;
  - d) provođenje odluka Upravnog odbora i preduzimanje mjera za njihovo provođenje;
  - e) zakonitost rada Fonda;
  - f) predlaganje unutrašnje organizacije Fonda, godišnjeg programa rada Fonda i finansijskog plana Fonda;
  - g) podnošenje izvještaja o poslovanju i izvršenje finansijskog plana Fonda Upravnom odboru;
  - h) izvršavanje i drugih zadataka definiranih aktima Fonda.

#### **Amandman XXIX.**

Nakon teksta iz amandmana 28. dodaje se novi član 30. koji glasi:

#### **Član 30. (Akti Fonda i nadzor na radom Fonda)**

- (1) Opći akti Fonda su: Statut Fonda, Pravilnik o unutrašnjoj organizaciji Fonda i drugi akti koji su definirani Zakonom o finansijskim institucijama u Bosni i Hercegovini.
- (2) Osnovni akt Fonda je Statut koji sadrži sljedeće odredbe o:
  - a) djelokrugu Fonda;
  - b) organima i tijelima Fonda;
  - c) dugim pitanjima značajnim za rad Fonda.
- (3) Pravilnik o unutrašnjoj organizaciji Fonda sadrži odredbe o:
  - a) organizaciji rada i načinu rada u Fondu;
  - b) pravima, obavezama i odgovornostima zaposlenih u Fondu;
- (4) Upravni odbor Fonda u roku od 60 dana od dana imenovanja donosi opće akte Fonda navedene u stavu (1) ovog člana.
- (5) Nadzor nad radom Fonda provodi Ured za reviziju finansijskih institucija Bosne i Hercegovine.

### **Amandman XXX.**

U Prijedlogu zakona nakon člana 30. dodaje se novi dio koji glasi: IX. KAZNENE ODREDBE

### **Amandman XXXI.**

Nakon teksta iz amandmana 30. dodaje se novi član 31. koji glasi:

#### **Član 31.**

- (1) Novčanom kaznom u iznosu od 1.000,00 KM do 5.000,00 KM kaznit će se MSP-i za prekršaj ako ne vrate sredstva iz člana 11. stav (2) ovog zakona.
- (2) Novčanom kaznom u iznosu od 1.500,00 KM do 5.000,00 KM kaznit će se MSP-i ako odobrena sredstva za kredit, jemstvo ili pomoć koriste suprotno namjeni ili uslovima utvrđenim odlukom o njihovom odobravanju iz člana 26. ovog zakona.
- (3) Novčanom kaznom u iznosu od 500,00 KM do 1.500,00 KM kaznit će se odgovorno lice MSP-a za učinjeni prekršaj iz st. (1) i (2) ovog člana.
- (4) Zahtjev za pokretanje prekršajnog postupka za prekršaje iz st. (1) i (2) ovog člana može podnijeti Fond ili Ministarstvo.
- (5) MSP-i iz st. (1) i (2) ovog člana obavezni su vratiti sredstva pomoći u roku od 15 dana od dana pravosnažnosti odluke o počinjenom prekršaju, po kojoj je MSP proglašen krivim za djelo prekršaja iz st. (1) i (2) ovog člana.
- (6) MSP-i kojima je pravosnažnom odlukom izrečena kazna za prekršaj iz stava (5) ovog člana ne mogu ostvariti pravo na podsticajne mjere predviđene ovim zakonom u periodu od pet godina od pravosnažnosti odluke.

### **Amandman XXXII.**

U Prijedlogu zakona nakon člana 31. dodaje se novi dio koji glasi: X. PRIJELAZNE I ZAVRŠNE ODREDBE

### **Amandman XXXIII.**

Nakon teksta iz amandmana 32. dodaje se novi član 32. koji glasi:

#### **Član 32.**

- (1) Vijeće ministara imenovat će članove Upravnog odbora Agencije i direktora Agencije na način utvrđen u čl. 21. i 22. ovog zakona, u roku od 60 dana od dana stupanja na snagu ovog zakona.
- (2) Vijeće ministara imenovat će članove Upravnog odbora Fonda i direktora Fonda na način utvrđen u čl. 27. i 28. ovog zakona, u roku od 60 dana od dana stupanja na snagu ovog zakona.

### **Amandman XXXIV.**

Nakon teksta iz amandmana 33. dodaje se novi član 33. (prepisati član 18. iz Prijedloga zakona) koji glasi:



### **Član 33.**

#### **(Obaveza usklađivanja propisa)**

Entiteti i Brčko Distrikt obavezni su svoje zakonodavstvo iz oblasti razvoja i podsticaja MSP-a i poduzetništva, kao i prateće propise, uskladiti s ovim zakonom u roku od šest mjeseci od dana njegovog stupanja na snagu.

### **Amandman XXXV.**

U Prijedlogu zakona na strani 9. brisati član 16. (Sastav i imenovanje Foruma), dio VI. (NOSILAC PROVOĐENJA RAZVOJA, PROMOCIJE I PODSTICAJA MSP BOSNE I HERCEGOVINE i član 17. (Nosilac aktivnosti koordinacije razvoja, promocije i podsticaja MSP).

Nakon teksta iz amandmana 35. dodaje se novi član 34. (prepisati član 19. iz Prijedloga zakona) koji glasi:

### **Član 34.**

#### **(Stupanje na snagu)**

Ovaj zakon stupa na snagu osmog dana od dana objavljivanja u "Službenom glasniku BiH".

"Za" amandmane glasalo je 15 poslanika (iz Federacije BiH 13, iz Republike Srpske dva), devet je glasalo „protiv“ a šest je bilo „suzdržano“. Predsjedavajući je konstatirao da nema potrebne entitetske većine, nakon čega je Kolegij Doma odmah proveo usaglašavanje. Kako nije postignuta saglasnost, prešlo se u drugi krug glasanja.

U drugom krugu, sa 16 glasova „za“ (iz Federacije BiH 14, iz Republike Srpske dva), sedam glasova „protiv“ (iz Republike Srpske) i četiri „suzdržana“ glasa, Dom je usvojio amandmane Azre Hadžiahmetović.

Zatim se prešlo na glasanje o Prijedlogu zakona. „Za“ je glasalo 19 poslanika (iz Federacije BiH 17, iz Republike Srpske dva), osam „protiv“ a četiri poslanika bila su „suzdržana“, te je predsjedavajući konstatirao da nema potrebne entitetske većine i da će Kolegij kao komisija, u roku od tri dana, pokušati postići saglasnost o čemu će Dom biti obaviješten.

#### **Ad.10. Prijedlog zakona o izmjenama i dopunama Zakona o zaštiti tajnih podataka, predlaže: Vijeće ministara BiH, zakon broj: 01,02-02-8-19/10, od 4.2.2010., sa Izvještajem Zajedničke komisije za nadzor nad radom Obavještajno-sigurnosne agencije BiH**

Predsjedavajući je dao kratke uvodne napomene. Nije bilo rasprave.

„Za“ Izvještaj Zajedničke komisije glasalo je 10 poslanika (iz Federacije BiH dva, iz Republike Srpske osam), 19 je glasalo „protiv“ a dva su bila „suzdržana“. Predsjedavajući je konstatirao da Dom nije prihvatio negativan Izvještaj Zajedničke komisije za nadzor nad radom Obavještajno-sigurnosne agencije BiH, pa se Prijedlog zakona vraća Zajedničkoj komisiji radi dostavljanja novog izvještaja Domu.

**Ad.11. Prijedlog zakona o izmjenama i dopunama Zakona o službi u Oružanim snagama Bosne i Hercegovine, predlagač: poslanik Niko Lozančić, zakon broj: 01-02-8-24/10, od 23.3.2010., sa Izvještajem Zajedničke komisije za odbranu i sigurnost BiH**

Nakon uvodnih napomena predsjedavajućeg, nije bilo rasprave u okviru ove tačke dnevnog reda.

Dom je, s 24 glasa „za“ (iz Federacije BiH 15, iz Republike Srpske devet), osam „protiv“ i bez „suzdržanih“ glasova, usvojio negativan Izvještaj Zajedničke komisije za odbranu i sigurnost BiH, te je Prijedlog zakona o službi u Oružanim snagama Bosne i Hercegovine odbijen u drugom čitanju.

**Ad.12. Prijedlog zakona o izmjenama i dopunama Krivičnog zakona Bosne i Hercegovine, predlagači: poslanici Kluba SDP, zakon broj: 01-02-5-31/10, od 21.4.2010. (prvo čitanje)**

Predsjedavajući Niko Lozančić dao je kratke uvodne napomene. U raspravi je učestvovao Denis Bećirović.

„Za“ Prijedlog zakona glasala su 22 poslanika (iz Federacije BiH 20, iz Republike Srpske dva), osam je glasalo „protiv“ a jedan poslanik bio je „suzdržan“. Predsjedavajući je konstatirao da nema potrebne entitetske većine, nakon čega je Kolegij Doma odmah proveo usaglašavanje. Kako nije postignuta saglasnost, prešlo se u drugi krug glasanja.

U drugom krugu, s 22 glasa „za“ (iz Federacije BiH 20, iz Republike Srpske dva), devet glasova „protiv“ (iz Republike Srpske) i jednim „suzdržanim“ glasom, Dom je usvojio Prijedlog zakona o izmjenama i dopunama Krivičnog zakona Bosne i Hercegovine u prvom čitanju.

**Ad.13. Prijedlog revidirane strategije Bosne i Hercegovine za provođenje Aneksa VII. Dejtonskog mirovnog sporazuma, predlagač: Vijeće ministara BiH, Prijedlog broj: 01-37-310/10, od 15.2.2010. (drugo čitanje)**

Niko Lozančić dao je kratke uvodne napomene. U raspravi je učestvovao Beriz Belkić.

„Za“ Prijedlog revidirane strategije glasala su 22 poslanika (iz Federacije BiH 20, iz Republike Srpske dva), niko nije glasao „protiv“ a 10 poslanika bilo je „suzdržano“, te je predsjedavajući konstatirao da nema potrebne entitetske većine i da će Kolegij kao komisija, u roku od tri dana, pokušati postići saglasnost o čemu će Dom biti obaviješten.

**Ad.14. Prijedlog strategije za razvoj sporta u Bosni i Hercegovini, predlagač: Vijeće ministara BiH, Prijedlog broj: 01,02-35-372/10, od 24.2.2010. (drugo čitanje)**

Niko Lozančić podsjetio je da je Ustavnopravna komisija usvojila jedan amandman koji glasi:

**Amandman I.**

U Prijedlogu strategije za razvoj sporta u BiH u nomenklaturi sportskih grana i grana sporta u BiH u tabeli u rubrici: Grana sporta pod rednim brojem 20. riječi „1.karate“ mijenjaju se riječima:

1. Šotokan
2. Šitoriu
3. Vadoriu
4. tradicionalni karate

Nije bilo rasprave u okviru ove tačke dnevnog reda.

S 29 glasova „za“ (iz Federacije BiH 20, iz Republike Srpske devet), bez glasova „protiv“ i tri „suzdržana“ glasa, Dom je usvojio Strategiju za razvoj sporta u Bosni i Hercegovini u drugom čitanju.

**Ad.15. Izvještaj komisije Kolegija o nastojanju za postizanje saglasnosti o Prijedlogu zakona o izmjenama i dopunama Zakona o polaganju pravosudnog ispita u Bosni i Hercegovini (zakon u prvom čitanju)**

Niko Lozančić dao je kratke uvodne napomene, nakon čega nije bilo rasprave u okviru ove tačke dnevnog reda.

U drugom krugu, s 22 glasa „za“ (iz Federacije BiH 20, iz Republike Srpske dva), devet glasova „protiv“ (iz Republike Srpske) i jednim „suzdržanim“ glasom, Predstavnički dom usvojio je Prijedlog zakona u prvom čitanju.

**Ad.16. Godišnji izvještaj Visokog sudskog i tužilačkog vijeća Bosne i Hercegovine za 2009.godinu, materijal broj: 01,02-03-50-3-646/10, od 7.5.2010.**

Predsjedavajući je rekao da je predsjednik Visokog sudskog i tužilačkog vijeća BiH dostavio obavještenje da zbog ranije preuzetih obaveza nije u mogućnosti odazvati se pozivu da prisustvuje sjednici, te moli da se ova tačka odgodi za narednu sjednicu Doma. Na glasanje je stavio prijedlog da Dom uvaži ovaj zahtjev i odgodi raspravu za narednu sjednicu Doma.

S 25 glasova „za“ (iz Federacije BiH 14, iz Republike Srpske 11), jednim „protiv“ i jednim „suzdržanim“ glasom, Dom je usvojio ovaj prijedlog i odgodio raspravu o Godišnjem izvještaju Visokog sudskog i tužilačkog vijeća BiH za 2009. za narednu sjednicu Predstavničkog doma.

**Ad.17. Izvještaj o radu Upravnog odbora Izvozno-kreditne agencije Bosne i Hercegovine za 2009. godinu, materijal broj: 01,02-50-3-514/10, od 1.4.2010. (odgođena rasprava na 77. sjednici)**

Niko Lozančić napomenuo je da je na 77. sjednici, održanoj 12.5.2010., odgođena rasprava o Izvještaju zbog neprisustva podnosioca Izvještaja. U raspravi su učestvovali: Slavko Jovičić, Beriz Belkić, Adem Huskić i Željko Kuzmanović.

Kolegij Doma predložio je zaključak koji glasi:

**„Ogđa se rasprava o Izvještaju o radu Upravnog odbora Izvozno-kreditne agencije Bosne i Hercegovine za 2009. godinu i zadužuje Komisija za vanjsku trgovinu i carine da ponovo razmotri ovo pitanje i dostavi novo mišljenje“.**

Zaključak je usvojen s 29 glasova „za“ (iz Federacije BiH 18, iz Republike Srpske 11), bez glasova „protiv“ i dva „suzdržana“ glasa.

**Ad.18. Izvještaj o zaštiti ličnih podataka u Bosni i Hercegovini za 2009., materijal broj: 01,02-50-3-595/10, od 22. 4.2010.**

Nakon što je Niko Lozančić dao kratke uvodne napomene, nije bilo rasprave.

„Za“ Izvještaj je glasalo je 28 poslanika (iz Federacije BiH 19, iz Republike Srpske devet), jedan je glasao „protiv“ a dva poslanika bila su „suzdržana“. Predsjedavajući je konstatirao da je Dom usvojio Izvještaj o zaštiti ličnih podataka u Bosni i Hercegovini za 2009.

**Ad.19. Izvještaj o radu Državne agencije za istrage i zaštitu (SIPA) za 2009. godinu, sa Izjašnjenjem o određenim pitanjima (prijedlog za uvrštavanje: Zajednička komisija za odbranu i sigurnost BiH, akt broj: 03/1-50-3-503,51/10, od 4.5.2010.)**

Predsjedavajući je dao uvodne napomene. Nije bilo rasprave.

„Za“ Izvještaj je glasalo 16 poslanika (iz Federacije BiH devet, iz Republike Srpske sedam), osam je glasalo „protiv“ i šest je bilo „suzdržano“. Predsjedavajući je konstatirao da nema potrebne entitetske većine, pa se prešlo u drugi krug glasanja.

U drugom krugu, sa 17 glasova „za“ (iz Federacije BiH 10, iz Republike Srpske sedam), 10 glasova „protiv“ (iz Federacije BiH devet, iz Republike Srpske jedan) i tri „suzdržana“ glasa, Dom je usvojio Izvještaj o radu Državne agencije za istrage i zaštitu (SIPA) za 2009. godinu, sa Izjašnjenjem o određenim pitanjima.

**Ad.20. Davanje saglasnosti za ratifikaciju:**

- a) Sporazuma o finansiranju između Bosne i Hercegovine i Komisije Evropskih zajednica u vezi s horizontalnim programom o nuklearnoj sigurnosti i zaštiti od zračenja, u okviru Instrumenta za pretpristupnu pomoć u 2008. godini,
- b) Sporazuma o vojnom grantu između Vijeća ministara Bosne i Hercegovine i Vlade Republike Turske, Provedbenog protokola o finansijskoj pomoći između Ministarstva odbrane Bosne i Hercegovine i Generalštaba Republike Turske i Logističkog provedbenog protokola između Ministarstva odbrane Bosne i Hercegovine i Generalštaba Republike Turske,
- c) Sporazuma o finansiranju i projektu između KfW-a, Frankfurt na Majni, i Bosne i Hercegovine i Javnog preduzeća „Elektroprivrede Hrvatske zajednice Herceg Bosne“ d.d Mostar (EP HZHB) – Projekat Dopunske mjere za Vjetroelektranu Mesihovina,
- d) Evropske povelje o regionalnim i manjinskim jezicima, Strasbourg, 5.11.1992.

Niko Lozančić podsjetio je da je nadležna Komisija za vanjske poslove dala pozitivno mišljenje o sporazumima, nakon čega nije bilo rasprave.

Dom je, s 28 glasova "za" (iz Federacije BiH 20, iz Republike Srpske osam), dva „protiv“ i bez „suzdržanih“ glasova, usvojio prijedlog da se Dom u paketu izjasni o sporazumima od tačke a) do tačke d).

Dom je, s 28 glasova "za" (iz Federacije BiH 19, iz Republike Srpske devet), dva „protiv“ i dva „suzdržana“ glasa, dao saglasnost za ratifikaciju sporazuma od tačke a) do tačke d).

Time je realiziran dnevni red.

Na kraju je predsjedavajući podsjetio da je održavanje 79. sjednice Predstavničkog doma planirano za 16.6.2010.

Sjednica završena u 15, 05 sati.

Sastavni dio Zapisnika je transkript 78. sjednice Predstavničkog doma.

SEKRETAR  
PREDSTAVNIČKOG DOMA  
**Branka Todorović**

PREDSJEDAVAJUĆI  
PREDSTAVNIČKOG DOMA  
**Niko Lozančić**